

Commerzi e fieras da muvel

■ Il commerzi da muvel cumpiglia il commerzi da muvel gross (muvel bovin) e da muaglia manidla (portgs, nursas, chauras) sco era da chavals, mils e milets, asens e pulom. Dapi il 13avel tschientaner è attestadas diversas fieras da muvel entaifer ed en ils conturns dal Grischun che vegnivan frequentadas era da martgadants da l'exteriur. En il 14avel tschientaner per exempel visitavan ils martgadants da Ligiaun regularmain la fiera da s. Gagl a Lags (16 d'october). Cifras concretas davart svieutas da muvel èn, per mancanza da funtaunas, strusch tradidas. En il spazi retic alpin è s'intensivà en il temp autmedieval ed oravant tut en il temp medieval tardiv l'allevament da muvel gross per proveder il spazi economic lumbard urbanisà e fermamain populà. L'allevament da muvel bovin è sa derasà en quel temp a donn e cust da l'allevament da nursas. En il 15avel tschientaner è attestà in export intensiv da bovs, chavals e tgirs. Ils animals destinads a la vendita en fiera vegnivan chatschads l'atun da las pastgiras sin las fieras dal sid da las Alps e dal Tirol. Per la societad purila dal Grischun ha furmà il martgà oravant tut da muvel gross durant tschientaners la pli impurtanta (e per blers la suletta) funtauna d'entradas en contant. Il martgà da muaglia manidla giugava ina rolla localmain e regionalmain variada, tut en tut però secundara. Dapi il temp medieval han existì era fieras spezializadas da chavals, muvel bovin, nursas e portgs. La Surselva ed il Partenz han vendì durant tschientaners e fin a la Segunda Guerra mundiala milis da nursas alpegiadas a purs glarunais; in grond dumber vegniva chatschà sin las fieras da Turitg, Constanza e Lindau. Cun l'augment dal commerzi da muvel cun svieutas da dieschmilis chaus (era muvel gross) han era ils martgadants da professiun augmentà lur impurtanza. Già enturn il 1500 chattain nus martgadants da muvel lumbards en la Lumnezia, sursilvans ed engiadinais a Vaniescha ed, a partir dal 1580, cumpraders da muvel da razza dal Partenz (en il 18avel tschientaner era martgadants engiadinais) en la Part Sura Bernaisa. Il dumber da fieras a l'intern dal Grischun è creschì massivamain en il 18avel tschientaner, ina buna part da quellas aveva dentant – causa l'aut grad d'autoprovediment – ina pli grond'impurtanza sociala che economica. Il commerzi en natirialis tranter indigens e vischins predominava anc en il 19avel tschientaner, cun esters martgadav'ins en daner contant. Causa la ferma autonomia communal e la mancanza d'ina pussanza centrala èn las fieras en il Grischun sa splegadas fin viaden il 19avel tschientaner solitmain senza formalitads legalas particularas. Cun quai ch'il basegn da charn da las aglomeraziuns urbanas vegniva cuvert en il decurs dal 19avel tschientaner tras purs da la Bassa e dal Giura, è il territori alpin sa transformà successivamain en ina regiun d'allevament e da furniziun da muvel da razza e da vaders d'engrasch. Ils martgadants talians e lur intermediars han cumenzà a cuvrir ina part impurtanta da lur basegn da muvel tras cumpras directas dals purs. Las fieras al sid da las Alps (Tiraun, Blinzuna, Giubiastg, Ligiaun) han dentant cuntinuà a giugar ina rolla centrala per il commerzi da muvel grischun, essend che la Regenza grischuna n'è betg reussida da spustar quel en il Grischun sez. L'atun 1851 per exempel èn vegnids chatschads mo sur il Lucmagn 3000–4000 arments bovins a Ligiaun. En la segunda mesadad dal 19avel tschientaner èn sparidas las fieras lumbardas en consequenza da la construcziun da viafiers, ed ils purs grischuns èn vegnids sfurzads da midar concept. La patenta per il commerzi da muvel è vegnida reglada il 1927 en in concordat intercantunal ed è dapi il



«Fiera grossa» a Lugano. Maletg da Rocco Toricelli, 1799.

1941 obligatorica. Il 1925 è vegnida fundada l'Associaziun per l'utilisaziun da portgs. Suentar la Segunda Guerra mundiala èn naschidas sin plaun regiunal e naziunal numerusas autras organisaziuns parentadas. Da quellas èn ressortidas tranter auter il 1949 l'Associaziun svizra per il provediment da muvel da maz e da charn che sa numna dapi il 2000 Proviande. Il 1957 ha la Confederaziun prendì per l'emprima giada mesiras per promover la svieuta da muvel da razza e da maz, oravant tut da regiuns muntagnardas. La midada structurala da l'agricultura, las midadas tecnicas (tecnica da tegnair a frestg), l'internaziunalisaziun e la globalisaziun dals martgads han transformà radicalmain il commerzi da muvel dapi ils onns 1960 e pretendan dals purs ina gronda flexibilitad sin il martgà agricul determinà dal stadi (per part a moda subsidiara) e dals gronds distributurs.

Adolf Collenberg

Fieras

Il dretg da fiera era en il temp medieval ina regaglia colliada cun il dretg da citad. La dubla significaziun dal term sursilvan «marcau» (citad e martgà/fiera) tradescha quel connex istoric. Suentar il declin dal sistem feudal è passada quella regaglia cun tut las autras als cumins. Tgi che tegneva fiera stueva procurar per la segirtad da persunas e rauba. A Cuira vegnivan cas penals en connex cun il commerzi da muvel reglads al lieu tras la dretgira respectivamain in derschader da fiera. Las fieras emnilas (tegnidas ina fin duas giadas l'emna) vegnivan organisadas dals vischinadis a bainplachair. Quellas servivan als basegns dal mintgadi. La plipart è vegnida introducida en il 16avel tschientaner, senza formalitads en scrit. Il commerzi intern era modest en consequenza da l'autoprovediment garantì per gronda part tras l'agricultura locala e per mancanza da citads ed industrias. Ils purs disponivan strusch da daners, ed il barat da natirialis predominava anc enturn il 1820 sin las fieras emnilas, per exempel a Tavau. Cun esters martgadav'ins en daner contant. Il 1239 è attestada la fiera claustrala a Müstair (tegnida il settember) che concurrenzava a partir dal 1290 cun quella da Gluorn, daventada fitg impurtanta per l'Engiadina Bassa e la Val Müstair. En il temp medieval tardiv tegneva Lags ina fiera impurtanta a Langenberg. Già da quel temp sa concurrenzavan Farschno e Tusaun. La fiera da Las Agnas, instituida il 1729, è daventada (tenor Sprecher) la pli gronda da tuttas, cun excepziun da las fieras tegnidas a Cuira ils 12 da matg

(Churer Chilbi) ed il di da s. Tumasch (17 da schaner, dapi il 1748 il di da s. Andrea / 30 da november tenor il chalendar vegl). Quellas duravan mintgamai ogt dis ed eran da vegl ennà era termin da pajament. En auters lieus, per exempel a Mustér, aveva la fiera lieu il di da s. Martin (11 da november).

Sco utrò è il dumber da fieras creschì massivamain en il Grischun suenter il 1750. Il 1800 dumberava il Grischun 38, il 1850 già 98 vischinadis cun fiera. L'impurtanza sociala era en il cas da la plipart da las fieras blier pli gronda che quella economica. Var 40% avevan lieu durant ils mais settember u october. D'impurtanza vitala eran las fieras externas: Blinzuna (ina fiera per biestga da maz da la Surselva e dal Valragn) e Buorm. Il 1514 han las Trais Lias concedì a Tiraun la fiera da S. Mitgel (29 da settember) che durava nov dis. Quella garantiva svieutas enormas: il 1807 per exempel 10 000 arments e 3000 chavals. L'atun cumpravan ils martgadants indigens ed esters ils animals u prendevan tals en cumissiun (ils indigens). Ils vendiders chatschavan lur biestga sin il termin fixà al lieu da rimnada e surdavan quella als martgadants ed a lur gidanters. Durant il viadi pascalvan e chamavan las muntaneras en claus e sin pastgiras determinadas contractualmain. Il viadi a las fieras da Landeck, Damaist, Giubiastg, Ligiaun e Lucarn durava fin diesch dis. Ins chatschava il muvel per ordinarì d'ina fiera a l'autra, fin ch'ella era vendida. Concernent ils pretschs scriva la «Glarner Zeitung» il 1860 che quels sajan a Giubiastg dad aur, a Ligiaun d'argient e da là engiu da plum.

Il 1809 ha il Cussegl grond concedì (cun success da curta durada) a Cuira ed a La Punt-Chamuesch (successura da Las Agnas) ina fiera cun premiaziun per meglierar la qualitat da la biestga. Il 1846 ha el obligà las vischnancas da metter a disposiziun gratuitamain piazzas da fiera e da premiaziun, ed il 1850 è el sa patrùnà da las concessiuns da fiera. L'amplificaziun da las vias e la meglieraziun da las cundiziuns da transport han diminui la quantitat da fieras; il 1950 eran las bieras concentradas en intgins centers: a Cuira (25 dis), Glion (16), Casti (12), Tusaun (12), Landquart (8) e Scuol (8). L'urden da fiera actual sa basa sin la lescha dal 1896 e sin il decret dal 1994. En consequenza da la midada da structures sa splega la fiera da muvel quasi cumpletmain en il center a Cazas.

Durant tschientaners e fin viaden il 20avel tschientaner cumpravan ils purs

glarunais, oravant tut quels da Dialma, a la fiera da Glion (tegnida il zercladur millis nursas ch'els chatschavan sur il Veptga sin lur alp. Pulitas quantitads da nursas cumpravan els era en il Partenz. Ina fiera tut speziala – e causa la premiaziun d'impurtanza centrala per l'allevament da muvel da tratga – era avant l'introducziun da l'inseminaziun artificziala (1966) quella da premiaziun da taur a Cuira, iniziada il 1900 cun 170 animals (1937 1204 / culminaziun; 1997 56 / davosa fiera da taur).

Las fieras da martganzia las pli impurtantas eran Com (lieu da transtgardiada per la regiun dals lais e per la Vuclina, fiera tegnida durant 10 dis suenter il firà da Pasca, a partir dal 15avel tschientaner durant ogt dis avant e suenter Pasca ed a partir dal 1447 durant ogt dis il di da s. Gliezi / december), Milaun (fiera tegnida ogt dis avant ed ogt dis suenter il di da s. Ambrosi / 4 da december) e Genua (fiera tegnida l'entir onn, cun martganzia da l'Orient).

Fieras da grond'impurtanza regiunala: Buorm (tegnida l'entschatta d'october, cun numerus visitadurs grischuns, oravant tut a partir dal 1487); Clavenna (fiera da S. Andrea / 30 da november, a partir dal 1432 la fiera da S. Gagl / 16 d'october); Biasca (attestada il 1515, spustada da l'emna songta a 15 dis suenter Pasca); Malvaglia (documentada a partir dal 1478 sco fiera da S. Martin); Roveredo (fiera da S. Gagl / 16 d'october, ogt dis, attestada a partir dal 1467 / grond concurrent per Blinzuna); Blinzuna (s. Baltramiu, documentada il 1055, il 1420 durant ogt dis avant e suenter s. Baltramiu / 24 d'avust); Ligiaun (documentada il 1388, emprima dumengia d'october); Chiasso (fiera da chavals a partir da la mesadad dal 15avel tschientaner, tegnida durant ogt dis avant e suenter Pasca); Cremona, Varese (fiera da chavals documentada il 1402, tegnida l'october); Vercelli (fiera da chavals, tegnida durant ogt dis avant e suenter il prim da matg); Arona (martgà da rauba).

Las pli veglias documentaziuns da fieras grischunas: L'emprima fiera per Cuira è documentada l'onn 952; Mustér, 11 da fanadur, documentada avant il 1290, pli tard s. Martin (11 november); Lags/Langenberg, 16 d'october (s. Gagl), documentada il 1308; fiera emnila (tegnida la sonda) a Spleia e fiera dals 6 d'october, documentada a partir dal 1443 (d'ina tschert'impurtanza); Farschno, 25 d'avrigl e 29 da settember, documentada il 1354; Tusaun, 3 da matg e 18 d'october, docu-

mentada il 1497; Maiavilla, 17 da zercladur, documentada il 1472.

Adolf Collenberg

Locarno (Lucarn)

Citad en il chantun Tessin, situada al Lai da Lucarn, talian Locarno (uffizial). L'onn 1154 ha l'imperatur Friedrich I (Barbarossa) legà a la claustra da Mustér la vischnanca da Lucarn e terren fritgavel tranter ils lais da Lucarn e da Ligiaun al pe da la ruta dal Lucmagn, promovida fermamain dad el sez. Da grond'impurtanza economica per il Grischun e la Svizra Oriental è stada dapi il temp medieval tardiv la fiera da muvel a Lucarn (mez october). Fin a l'entschatta dal 18avel tschientaner cumpravan ils martgadants talians il muvel directamain dals purs, pli tard stuevan els ir sez sin las fieras tessinaisas a vender lur biestga. Il muvel ch'els na pudevan betg vender a Giubiastg vegniva puspè offert a Ligiaun ed a Lucarn e las restanzas vendidas en l'Italia dal Nord. La fiera da Lucarn ha gè sia fluriziun en ils onns 1840. Vers la fin dal 19avel tschientaner ha ella pers si'impurtanza per il Grischun.

Adolf Collenberg

Lugano (Ligiaun)

Citad tessinaisa al Lai da Lugano, talian Lugano (uffizial). Podestataria da la Confederaziun 1513–1798. Impurtant surtot per la Lia Grischa era la fiera da muvel a Ligiaun ch'existiva già en il temp medieval. D'impurtanza internaziunala è dentant daventada pir l'uschenumnada fiera grossa, installada il 1513 per ca. 15 dis durant l'october sin la Piazza del Castello. Il muvel, surtot bovs per manadiras, vegniva surpiglià dals martgadants indigens e chatschà sur il Lucmagn (Surselva e Glaruna) u sur il San Bernardin (Il Plaun e vals dal Rain Posterior) per alura vegnir vendì sin las fieras al sid. Dal 1608–43 è il commerzi da muvel sa spustà sin la nova fiera da s. Baltramiu a Giubiastg. Ils effectivs restants vegnivan vendids a Ligiaun e Lucarn. Enturn il 1900 ha la fiera da Ligiaun pers si'impurtanza per il Grischun.

Adolf Collenberg

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.